

ما أدري أنا بالحلم لو بالصدق أوصل كربلا
وأتعنى يم بويه وقمر هاشم كفيل العايله
وينه نتلاقى .. بويه مشتاقه

لمن تسافر لاهل .. وبالوطن تترك طفل
تخلي يمه طفل مثله .. يسلي قلبه وينشغل

والطفل ما يحتمل .. لو عن أهله ينسأل
فوق خده دمعته .. تنظره ابحسره يهل

يبقى ينظر ما يمل .. إلرجعت أهله ياتمل
ولو عليه إيطولون .. قلبه يشعر بالثكل

وآني بس مو بالمثل .. لا خبر لاهلي يصل
مَدري عن أحوال أهلي .. لا كتاب وينرسل

ما أدري عن أهلي ولا ليهم كتاب وأرسله
منهو اليدليني ومن ياخذ كتابي يوصله
وينه نتلاقى .. بويه مشتاقه

أتمنى عبدالله أحمله .. عن سكينه وأدخله
خيمة العباس أكله .. هالرضيع إتأمله

يلي شد الراحله .. وينه وعدك أسأله
ترضى عبد الله العطش .. ذب دليله وذبله

أنت عمه وكافله .. ها يراعي المرجله
يالله خوض العلقمي .. وجيش أميه فالله

عمي جيب الماي إله .. يروا والي ايفضله
نشربه خلفه يساقي .. أني ويا العايله

أدخل بخويه للقمر وآني بدموعي اتوصله
يا عمي يا حامي الظعن إنهض وجيب الماي إله
وينه نتلاقى .. بويه مشتاقه

أتمنى آني بالطفوف .. ويا أهلي ابهاظروف
عند أبويه وعمتي .. وعمي يحلالي الوقوف

ومن يگحم عالآلوف .. اللي مَيرد الضيوف
أنظره وأوقف أحشمه .. أدري بو فاضل عطوف

إتراحمت بيه السيوف .. إقتحم ذيج الصفوف
ابكرفته صوب المخيم .. بو الفضل عزم يطوف

اتقطعت منه الجفوف .. إمن السهم ما عاد إشوف
يا وسف بدر الهواشم .. بالعمد صابه الخسوف

يا وسفه جودك يا قمر هاشم من دمومك مله
يا من يخوض العلقمي وجوفه أبد ما بلله
وينه نتلاقى .. بويه مشتاقه

أتمنى بويه أحضره .. من يطيح إعلى الثرى
راسه إبحجري أوسده .. وأمسح الدم الجرى

لكن آني امحيره .. قلبي شلي ايصبره
سهم لمثلث أشوفه .. ينزعه من الورا

مگدر أنظر له ترى .. لو شمر سيفه اشهره
ابنعله يتربع فِصدره .. ويبتي يحز منحه

شلون أعوفه بالعرا .. وأمشي عنه اميسره
ودي لو أقعد أظله .. وييدي دُور خنصره

ما أدري أقدر أنظره بويه الشمر من يقتله
بس آني ما أقدر أظل برض المدينه إمغله
وينه نتلاقى .. بويه مشتاقه

أتمنى تشفى علتي .. ولّيه ترجع صحتي
وأعتني الطف كربلا .. ويا بويه واخوتي

أواسي زينب عمتي .. وياها تحرق خيمتي
أركض ونيران أميه .. تشتعل في عبايتي

وياها تصبح وقفتي .. وعنهما أشكف ضربتي
فوق أبويه إعلى الثرى .. وياها تصبح طيحتي

لو تجيني إمنيتي .. والله غاية فرحتي
أفني عمري باليسر .. ويا خوله موتتي

ما ظني أقدر عالسبي وأنا اللي جنت امدلله
لكن يكون أرحم إلي وما ظل أتاني العايله
وينه نتلاقى .. بويه مشتاقه

كلشي أتمنى أكيد .. إلا وحده ما أريد
الشماته ابدخلتي .. مجلس الطاعي يزيد

لو بعد عزي العبيد .. اتشمنت دمعي اشيفيد
من بعد عباس عمي .. الشمر للظعن ايقيد

جسم أبويه إعلى الصعيد .. دامي منحور الوريد
إقبالي أتحسر وأشوفه .. بالرمح راسه يميد

وي رقيه مو بعيد .. أطلبه وآمد له إيد
وبالخرابه موتي يصبح .. إبطشت راس الشهيد

كل شي أنا له أستعد بس هالأمر متحملة
الله يساعد عمتي زينب على هذا البلا
وينه نتلاقى .. بويه مشتاقه